

*Honore Timi Kara:* Ki taku mahara e kore pea e taetae e tatou te whiriwhiri rawa o tenei mea i tenei ra, engari kua kite au kua whakaaturia mai e Henare Kaihau ana mahara i roto i tana pukapuka rarangi kua takoto nei ki te aroaro o te Komiti. A i mua o tera huihuinga ano o tatou ka whai taima hei mahinga ma Wi Pere raua ko Hone Heke i etahi rarangi pera ano ma raua, hei whakaatu mai i o raua mahara mo runga i enei take, kia whakahaerengia tahitia ai e tatou ena pukapuka e toru a tera tuunga o te Komiti.

TAKIWA POOTITANGA O TE TAI HAUAURU.

Me whai mana te Kaunihera—

- Ko aua ota katoa me tuku atu ki te Kooti Whenua Maori, a me panui ki roto ki te *Kahiti*, a ki te kore e piiratia i roto i nga marama e rua, me hiiri me haina aua ota e te Tiati o te Kooti.

Ki te takoto he piira, heoi ma te Kooti Whenua Maori e whakawa taua tonono, a ko ta te Kooti i whakatau ai koia tera te mutunga.

Me ahei te Kaunihera ki te tuku kereeme ki nga Komiti hapu, iwi ranei, a ma aua Komiti e uiui aua take a e ripoata.

Ka ahei te Kaunihera ki te whakamana i te ripoata a te Komiti, ki te whakatika ranei, ki te whakahoki ranei i taua ripoata ki taua Komiti, ki tetahi atu Komiti ranei, kia uiuia tuaruatia taua keehi.

Kaua rawa he whenua e hokona e moketetia ranei ki te Karauna ki te tangata noa iho ranei, engari e taea ai te pera me matua whakaae e te Kaunihera, otira kaua te Kaunihera e whakaae ki aua tu tuku kia oti ra ano te rahui he whenua hei oranga mo ia tangata nona te whenua.

Mehemea he kino katoa te whenua o tetahi Maori, a kaore ia e whiwhi oranga i taua whenua i te kino, me ahei noa atu ia ki te whakawhiti ki te hoko atu ranei i taua whenua, a ma te Kaunihera e hoko he whenua pai mona.

Me tere tonu te whakatautau me te wehewehe a te Kaunihera i etahi whenua hei oranga mo ia Maori me tona whanau, me te whakaputa i nga tiwhikete mo nga papakainga.